

# Ei vesa ora bein pigl Indoor Festival

La sonda e dumengia vargada ha igl Indoor Festival a Mustér attratg varga 1300 personas el Center Fontauna. Ils organisaturs cun *Florian Zanin* el presidi ein cuntents. Sco el ha declarau alla FMR, han ei fatg in gudogn. Quel tonschi denton buca per cuvierer il deficit digl onn vargau. «Il success d'uonn motivescha da cuntinuar», aschia Florian Zanin. Definitivamein vegnien ei denton aunc a decider suenter haver fatg bilantscha. Sch'ei cuntinueschien il 2024 veglien ei adattar il program da musica dil venderdis sera per aschia attrer era lu dapli visitadras e visitaders. Il venderdis ein 540 personas stadas agl Indoor Festival e la sonda 790 personas. (fmr/sr) **Pagina 3**

## Motivai da cuntinuar cugl Indoor Festival

Varga 1300 personas han gudiu il venderdis e la sonda il program e l'atmosfera digl Indoor Festival a Mustér. Ils organisaturs ein motivai da cuntinuar, decidan denton aunc pér co vinavon.

SUSI ROTHMUND/FMR

Suenter ch'igl Indoor Festival digl onn vargau haveva attratg mo 900 personas el Center Fontauna a Mustér, han ils organisaturs adattau ed optimau il festival. Sco igl ei semussau la davosa fin d'jamna han ei fatg quei cun success. Cun plascher communichescha *Florian Zanin*, il president dil comite d'organisaziun digl Indoor Festival a Mustér, ch'ei hagian saviu beneventar il venderdis 540 personas e la sonda 790 personas. Ils organisaturs speravan d'astgar beneventar silmeins 1000 personas e quella finamira han ei senza dubi surpassau per in bionton. Tuttina di Zanin: «Igl ei vegniu meglier che tertgau. Sche nus cuntinueschien sperain nus dil comite d'organisaziun naturalmeins dad aunc saver attrer dapli personas l'auter onn.»

### Passa 1300 hosps

Can passa 1300 personas san ils organisaturs pia discuorer d'in success e Zanin di: «Quei festival ha funcziunau, quei motivescha da cuntinuar.» Ier, dumengia havevan ei secape-scha aunc buca serrau giu il quen. Florian Zanin ha denton saviu dir ch'ei hagian fatg in gudogn, per ulivar la sperdita digl onn vargau da 10'000 francs tonschi quel denton buc. Sch'ei cuntinueschien l'auter onn cugl Indoor Festival ni buc vegni decidiu suenter haver tratg bilantscha, ei vesi denton ora bein.

### Optimar ed adattar vinavon

Ch'ei han saviu beneventar la sonda 250 personas dapli ch'il venderdis ha probablameins plis motivs. Per l'ina era il program dil venderdis sera cun Gigi, EAZ e Pronto, pia musica da



Gigi ha procurau il venderdis sera per atmosfera da festival.

### «Igl ei vegniu meglier che tertgau.»

Florian Zanin, president dil comite d'organisaziun

rap e hiphop, plitost orientaus alla giuventetgna e per l'autra vegni la sonda preferida sco sera dad ir en sortida. «Las generaziuns giuvnas han schau plascher fetg e gudiu il program dil venderdis, denton era quel dalla sonda», declara Zanin che ha sez schau plascher il meglier ils concerts dalla sonda. Giganto hagi procurau per tempra da festival e Bligg seigi sco adina cu el sepresenti live staus ina bumba. «Jeu hai gudiu il pli fetg Kamrad, el ei staus sin tribuna cun in'extrema energia», aschia Florian Zanin. Sch'ei detti l'auter onn ina cuntinuaziun, vegnien ei mintgacass a mirar d'optimar il program dil venderdis per che quel tili in publicum mischedau.